

Zapóslane

Na prašenja Fabiana Kaulfürsa w přinošku „Wólby do Serbskeho sejma“ we wudaću SN ze 24. oktobra wotmołwjataj rěčnikaj iniciatiwy za Serbski sejm dr. Měrćin Wałda a Hanzo Wylem-Keł:

Z wotmołwu na dwanaće Kukowskich prašenjow chcemy wujasnić, zo njeńdže ow aktualnej napjatosći wólbow sejma a naprašowanjow wo to, hač my tutón přeni Serbski sejm chcemy, ale hač scyła k demokratiskemu ludowemu zastupnistwu dóńdžemy. Ale što ze sejma budže, to dyrbymy jako lud po wólbach zhromadnje wuwic. Zdobom ma so rjec, zo dyrbjachmy so jako iniciatiwa stajnje w mjezystawje pohibować. Na jednej stronje dyrbjachmy dosć konkretne struktury a wobsahi sejmoweho džěla namjetować, zo bychy jeho trěbnosć a šansy spóznajomne byli. Na tamnej stronje wědžachmy, zo njejsmy scyła legitimowani pozdžišo wuzwolenemu sejmej něšto diktować. Tuž wostanu najprjedy jenož předstawy, z kotrychž móže woleny sejm potom čerpać. Tule někotre krótkte přispomnjenja na prašenja a problemy, kotrež Fabian Kaulfürst mjenuje abo kritizuje:

Čehodla njemóža ludžo nakřižować, hač Serbski sejm chcedža abo nic?: Hišće ženje njebu při wólbach někajkeho parlamenta tak prašane. Zakładna potřeba kóždeho ludu je, wuzwolić sebi parlament. Prašenje je tohodla zbytnje.

Strach znjewužiwanja: Přez wólbny porjad je zawěšćene, zo maja namjetowanske prawo za kandidatow jeničce zjednoćenstwa ze serbskimi zaměrami (štož so přez wólbny wuběrk pruwuje). Někajke znjewužiwanje móže so potajkim lědma stać.

Strach stronskeje rozkory: Serbski lud dóstanje ze sejmom přeni raz šansu, adekwatnje z rozdžělnymi měnjenjemi wobchadžeć, k tomu słuša tež stronska politika we wobłuku swobodneho demokratiskoho porjada zwjazkoweje republiki. Njehladajo na to přeje sej wjetšina kandidatow na konsens orientowane parlamentariske džělo.

Sejm pači: Mnozy, runje zwonka jadroweho regiona bydlacy maja za jónkrótnje wobohaćenje, zo čuja so woni přez wólby do sejma zaso jako džěl serbskeje zhromadnosće a zo móža samo sobu postajeć.

Što ma kubłanska awtonomija być?: Hižo we Wěteńčanskej iniciatiwje su Domowinske kruhi wo kubłansku awtonomiju wojowali. Kaž w zawodže hižo rozložene, matej so jeje wobjim a wuhotowanje přez Serbski sejm z potrjechenymi rozjimać a wuwojować.

Kubłanje je wotwisne wot staršich a nic wot strukturow: Runje staršiske iniciatiwy žněja prawidlownje njewuspěchi a su přeslapjene. Čuja so ze swojimi problemami same, dokelž njedóstawaja we wobstějacych strukturach kubłanskeje politiki zwjetša žanu podpěru.

Kak ma sejm sylniše sobupostajowanje w regionje docpěć?: Pak to docpějemy pak stejimy zboka a přihladujemy, kak wuwice w regionje dale bjez nas dale dže? Trjebamy za přežiwnjenje prawo sobupostajowanja w brunicy kaž w mnohich druhich wobłukach a ressortach.

Sejmikarjo chcedža swójski stat!: Swójski stat sej z nas hišće ženje nchtó žadał njeje ani wo tym rěčať njeje. Tutón strach wotpohladnje naši kritikarjo šěrja. Mamy to za najniši dypk, kotryž tući kritikarjo wotpohladnje wužiwaja, zo bychy so njewěstosće a wopačne informacije mjez ludom rozšěrjeli!

Sobudžělačerjo serbskich institucijow maja strach: Fakt je, zo wobsteji z wopačnym rozprawjenjom abo z wróćodžerženjom informacijow w medijach wulka njewěstosć mjez sobudžělačerjemi serbskich institucijow.

Pohóršk „Wuhladku“ je přehnaty: Kukowske prašaki a mnozy dalši praja, zo su ludžo přemało wo sejmje informowani. K tomu přinošowało je z wulkeho džěla bohužel tež „Wuhladko“, kotrež wo sejmje jenož njedospołnje abo njesolidnje rozprawješe. Na přikład njeby ničo wažnišeho było, hač we wólbnyh procesach wo kandidatach a jich motiwach informować, štož pak „Wuhladko“ ani naspomniło njeje.

Sejm njeje tola žadyn předparlament?: Wěcy so wuwijawa. Smy ze stawiznow předparlamentow wuknyli, zo přihtowachu předparlamenty stajnje wólby do poprawneho parlamenta. Dokelž pak smy wólby, tež zaso po historiskich přiškładach, hižo přihtowali a kandidatow nastajili, smy z bjezposrědnimi, swobodnymi, samsnymi a tajnymi wólbami pokročowali. Z tym wuslědkom, zo dóstanjemy poľnohódně ludowe zastupnistwo našeho ludu. Wšo druge by woznamjenjało bjezrespektnosć napřećo wolerjam.

Dalše zastupnistwo (Serbski sejm) wosłabi naš lud?: Kwantowy skok wot zastupnistwa, kotrež nima žane kompetency praweho parlamenta, k poľnohódnemu zastupnistwu sylni bjezdwěla poziciju serbskeho ludu. Wotmołwa na prašenje, što so stanje, jeli so nimo zwjazkoweho sejma druhi a třeći woli, je zbytna.

Dokelž je hišće jara wjele wotewrjenych prašenjow a dokelž wobsteji wšudže informaciska potřeba, štož džě nam Kukowska skupina pokazuje, dajmy so skónčnje do zhromadneje zjawneje diskusije – na dobro našeho ludu.

Wobsah tule wozjewjeneho dopisa njewotpowěduje w kóždym padže měnjenju redakcije.